

Жаннатга ҳисобсиз кирадиганлар

19:24 / 02.12.2016 5421

Ибн Аббос розияллоху анхудан ривоят қилинади: «Набий соллаллоху алайҳи ва саллам: «Менга умматлар кўрсатилди. Бас, бир набий ўта бошлади. У билан бирга бир уммат бор эди. Бир набий ўтди. У билан нафарлар бор эди. Бир набий ўтди. У билан ўн киши бор эди. Бир набий ўтди. У билан беш киши бор эди. Бин набий бир ўзи ўтди. Назар солсам, жуда кўп қора кўринди. Шунда мен: «Эй Жиброил! Анавулар менинг умматимми?» дедим.

«Йўқ. Лекин сен уфққа назар сол!» деди.

Қарасам, жуда катта қора кўринди. Шунда у: «Ана ўшалар сенинг умматинг. Уларнинг олдиларида етмиш мингтаси бор. Улар ҳисоб ҳам, азоб ҳам қилинмаслар», деди.

«Нима учун?» дедим.

«Улар куйдириш ила даволанмас, дам солдирмас, фол очдирмас эдилар ва Роббиларига таваккал қиласар эдилар», дедилар.

Шунда Укоша ибн Михсон туриб у зотнинг олдиларига бориб:

«Аллоҳга дуо қилинг! Мени ўшалардан қилсан!» деди.

«Эй Аллоҳим! Уни ўшалардан қилгин!» дедилар.

Кейин бошқа бир киши туриб: «Аллоҳга дуо қилинг! Мени ҳам ўшалардан қилсан!» деди.

«Унга Укоша сенда ўзиб кетди», дедилар. Икки шайх ва Термизий ривоят қилган.

Шарҳ: Саҳобаи киромлар Пайғамбаримиз соллаллоху алайҳи васалламдан бир оғиз бўлса ҳам сўз эшитиш, ўз илмларини ортдиришга жуда ҳам зўр иштиёқли эдилар. Бу мақсад йўлида улар турли услубларни қўллар эдилар. Аксар ҳолларда масжиди набавийда ўтириб У зотни ҳужраи саодатдан чиқишлиарини кутар эдилар.

Пайғамбаримиз соллаллоху алайҳи васаллам ҳам бу нарсани яхши билғанлари учун иложи борича саҳобаларга кўпроқ таълимотларни етказишга ҳаракат қиласар эдилар.

Ушбу ҳадиси шарифда у зот қиёмат куни бўладиган баъзи бир ҳодисалар ҳақида ахборот бермоқдалар. Унда турли набийлар турли ададдаги умматлари ила ўтганлари баён қилинмоқда. Уларнинг ичida Муҳаммад соллаллоху алайҳи ва салламнинг умматлари энг кўп эканлиги таъкидланмоқда. Шу билан бирга Муҳаммад соллаллоху алайҳи ва

салламнинг умматларида етмиш минг киши ҳисоб китобсиз ва азоб уқубатсиз тўғридан тўғри жаннатга киришлари айтилмоқда ва уларнинг бу баҳтга элтувчи сифатлари ҳам зикр қилинмоқда.

«Улар куйдириш ила даволанмас, дам солдирмас, фол очдирмас эдилар ва Роббилирига таваккал қиласлар эдилар».

Демак, жаннатга ҳисобсиз кирадиганлардан бўлиш учун тўрт сифатга эга бўлиш керак экан;

1-«куйдириш ила даволанмаслик»

Бунда ҳам, баъзи яраларига тамға қиздириб босиб даволаганда жоҳилиятдаги каби, тамға қиздириб босиш шифо берди деган, Аллоҳ таолога ширк келтиришдан иборат бўлган эътиқодни қилмаслик кўзда тутилган.

2-«дам солдирмаслик»

Яъни, жоҳилиятнинг ширкдан иборат дам солишини талаб қилмайдиган, Ислом ижозат берган дам солишини ўз-ўзидан шифо беради деб эътиқод қилмайдиган, балки, шифо Аллоҳ таоло томонидангина бўлади, деган эътиқодда бўладиган.

3-«фол очдирмаслик»

Яъни, фалон нарса бўлди, энди ёмонлик етса керак. Пистон нарса кўринди, у шумқадам эди, энди ишлар чатоқ, каби эътиқодларни қилишдан йироқ бўлиш керак. Бу дунёдаги барча яхшилик ҳам, ёмонлик ҳам фақатгина Аллоҳ таолонинг иродаси ила бўлади, деган қатъий ишонч билан яшаш керак.

4-«Роббилирига таваккал қиладиган»

Ҳамма нарсада фақат Аллоҳ таологагина суюнадиган.

Ана ўша тўрт сифатни ўзида мужассам қилган киши жаннатга ҳисобсиз кирадиган етмиш минг киши ичидан бўлар экан. Пайғамбаримиз соллаллоҳу алайҳи васалламдан бу улкан башоратни эшитгандан кейин ҳамма ўзи ҳам ўша саодатманд кишилар ичидан бўлишини орзу қилиб қолди ва...

«Шунда Укоша ибн Михсон туриб у зотнинг олдиларига бориб:

«Аллоҳга дуо қилинг! Мени ўшалардан қилсан!» деди.

Яъни, мен ҳам ўша жаннатга ҳисобсиз кирадиган етмиш минг киши бўлайин.

«Эй Аллоҳим! Уни ўшалардан қилгин!» дедилар.

Кейин бошқа бир киши туриб: «Аллоҳга дуо қилинг! Мени ҳам ўшалардан қилсан!» деди.

«Унга Укоша сенда ўзиб кетди», дедилар».

Яъни Укоша розияллоҳу анҳу ўзининг ўша етмиш минг киши қаторида бўлишини тилаб Пайғамбаримиз соллаллоҳу алайҳи васалламдан дуо

сұраган. У зот дуо қилғанлар. Ижобат соати бўлгани учун дуолари дарҳол қабул бўлган. Кейинги сўраган одам ўша соатдан кеч қолгани учун унга дуо қилмаганлар.

Ривоятларда бу одам ким эканлиги ҳақида маълумот йўқ. Эҳтимол, сўрови мувофақиятсиз чиққанидан хижолат бўлмасин деб номи зикр қилинмаган бўлса керак.